

四庫全書

集部

欽定四庫全書

集部
鹿洲初集卷十四至
六

詳校官左中允_臣瑯五珠

助教_臣常循覆勘

總校官進士_臣繆琪

校對官修撰_臣戴衢亨

謄錄監生_臣張鴻起

欽定四庫全書

鹿洲初集卷十四

廣州府知府藍鼎元撰

考

經學考

六經聖人經世之書也有天下國家身心性命之人皆不可一日廢者也為治而不本六經必流為刑名法術雜霸小補之治為學而不本六經必流為異端邪說支

離固陋之學故自古今以來名為儒者無不以窮經為要然經有五有六有九有十三之稱何昉乎致堂胡氏曰孔孟之門經無五六之稱其後世分禮樂為六合為五歟余謂稱五經自漢武帝置五經博士始也稱六經則莊子天運篇已有之其始于戰國可知也漢儒變其說曰六藝董子所謂簡六藝以贍養之史遷所謂六藝於治一者皆經也禮樂何以可合言漢文帝時竇公獻樂書乃周官大宗伯之司樂章則固在周禮中也河間

獻王與毛生等作樂記一篇其後又在禮記四十九篇之中是以或五或六任乎稱者之分合耳九經之名始于後漢至後唐明宗刻九經板印賣之自是始廣其傳十三經之名始于唐貞觀之世即今所傳之十三經無疑也說經之家漢儒為最至宋而指歸乃定易有連山有歸藏連山作于夏其亡已久隋劉炫偽造以獻被訟削籍歸藏作于殷漢初已亡晉時忽有之惟載卜筮鄭氏夾漈尊信之則好奇之過也周易文王周公孔子之

書故其傳至千秋不廢漢時說易者分為三家一曰田何之易乃商瞿受於孔子六傳至何而大興何三傳至施讐孟喜梁丘賀由是有施孟梁丘之學一曰焦贛之易無師授自言得之隱者第述陰陽災異不類聖人之經京房習之別為京氏學一曰費直之易亦無師授始以象象文言雜入卦中東京荀劉馬鄭皆傳其學康成註之王弼最後掃去象占之學弼註出而餘家皆廢然雜以異端之說啓魏晉玄虛之弊范甯謂其罪深于桀

紂也唐孔穎達作正義以弼為本李鼎祚集解排弼而
宗康成其後郭京陸希聲胡瑗皇甫泌蘇軾等解易者
不下百十家朱子謂秦漢以來攷象辭者泥于術數而
不得其弘通簡易之法談義理者淪于空寂而不適乎
仁義中正之歸因時立教以承三聖伊川先生易傳而
已然世謂伊川之易精于義理而略于卜筮於是言象
數者宗康節至朱子作本義啓蒙兼二家之說而易學
始大備焉書有古文今文今文伏生所授數傳而至歐

陽高謂之歐陽之學又有夏侯勝及勝子建為大小夏侯之學三家並行至東京而歐陽特盛古文得之孔壁中經孔安國編定以巫蠱事起不得列學宮至晉梅賾上之唐衛包合古今文為一而書始全然蔡九峯謂今文多艱澀古文反平易疑安國之序不類西京文字朱子亦疑之歐陽公日本刀歌有云徐福行時書未焚逸書百篇今尚存令嚴不許傳中國天下無人識古文疑此書今在日本國此亦近於好奇未可據為定論也陸

德明孔穎達蘇子瞻等所作書註疏解不下數十家獨
蔡九峯集傳折衷衆說就正朱子自明迄今皆用之漢
初言詩者亦有四家魯人申公訓詁為魯詩齊人轅固
生為齊詩燕人韓嬰為韓詩趙人毛萇獨云傳自子夏
為毛詩先儒亦謂詩序子夏所作而毛氏衛敬仲又加
潤色者鄭衆賈逵馬融並作毛詩傳鄭康成作毛詩牋
何肩全緩又註之齊詩亡于漢末魯詩亡于西晉韓詩
雖存無有傳者惟毛詩鄭牋獨立學宮朱子廢小序作

集註後人雖遺議紛紛然終不可易也春秋漢初有公羊穀梁鄒氏夾氏四家並行至王莽之亂鄒夾俱亡獨公穀立于學宮左氏之書最晚出久乃大盛賈逵服虔並為訓解至晉杜預又註之與公羊何休註穀梁范甯註俱立學宮自是三傳並行而諸儒多宗左氏獨朱子謂左氏考事頗精只是不知大義專去小處理會公穀考事甚疎然義理却精二人乃經生傳聞不曾見國史漢唐以來言春秋者大抵考傳而不知經至胡文定公

作春秋傳按左氏之義取公穀之精採孟子以下莊周
董仲舒王通邵堯夫二程橫渠之說以潤色之聖人筆
削褒誅之旨至是大明雖中間亦不免有牽強處然議
論正大今貢舉取士必宗之則亦無以易矣漢初未有
儀禮之名始于高堂生十七篇朱子疑學者見其中有
儀有禮遂合而名之嘗曰儀禮禮之根本又曰儀禮經
也禮記傳也鄭康成作儀禮註黃慶李孟慈為疏唐賈
公彥刪二疏而自為之然先儒多苦儀禮難讀張淳云

如劉歆所言則高堂生所得獨為士禮今儀禮乃有天子諸侯大夫之禮疑非高堂生書但篇數偶同朱子謂淳不深攷劉說所訂之誤又不察所謂士禮者特略舉首篇以名之其曰推而致于天子蓋專指冠婚喪祭而言若燕射朝聘則士豈有是禮而可推耶然則儀禮之為高堂生無疑也周禮一書起于漢武帝時河間獻王得周官五篇失冬官募以千金不得乃取考工記補之至劉歆校秘書始得序列多為諸儒所擯斥何休謂為

六國陰謀之書惟杜子春能通其義鄭衆鄭興皆讀之
康成獨以為周公致太平之迹故其學遂行于世論者
以王莽安石一再用之而亂天下疑非周公之書五峯
胡氏辯之尤力而朱子稱其廣大精密中間細碎處雖
可疑然非聖人亦做不得則伊川所謂有關雎麟趾之
意然後可以行周官之法度抑亦理有固然而不必以
莽安石為周禮累也禮記出于漢儒所輯錄其書多雜
而不純始自河間獻王所獻劉向校定戴德刪為八十

五篇所謂大戴禮也戴聖又損益為四十六篇為小戴禮馬融增月令明堂位樂記總四十九篇今大學中庸入于四書所存者四十七耳鄭康成王肅皇甫侃熊安生孔穎達衛湜之徒註疏不一而學者宗陳澧恨其書未經聖人之筆削則所望於後賢者不僅在註疏也論語漢初有齊魯之說傳齊論者王吉貢禹等傳魯論者龔奮夏侯勝等至張禹始合為一刪問王知道兩篇孔安國為之傳諸儒註疏訓解不可枚舉惟鄭康成何晏

立于國學後世以問王知道二篇不見為憾然聖經豈
禹所能刪必二篇出漢儒之偽作故不傳也孟子始註
於趙岐而揚雄韓退之以及伊川橫渠等解釋不下數
十家然自朱子集註出而百家註疏論語孟子者至是
始集大成雖有王充之刺孟馮休之刪孟司馬溫公之
疑孟蘇子瞻之辨說皆無損于日月之光而陸筠之翼
孟虞允文之尊孟併亦可以不煩也孝經遭秦火之後
為河間人顏芝所藏漢初芝子貞獻之凡十八章長孫

氏博士江翁后倉翼奉張禹皆名其學又有古文孝經與尚書同出而長孫氏有閨門一章其餘大較相似又有行出三章合為二十二章孔安國為之傳至劉向以顏本比古文除其繁惑以十八篇為定鄭氏馬融並為之註鄭氏或云康成其立義與康成所註他書不同梁時孔鄭二家並立學宮唐明皇復註之元行冲為疏宋邢昺作孝經正義朱子作孝經刊誤然觀其跋後數言則當世之疑者甚多而語錄又云疑非聖人之言則以

其說得不親切但言孝之效如此因有欲掇他書發明其旨別為外傳之意爾雅一書不知始于何時據郭璞序但稱興于中古隆于漢氏至唐陸德明作釋文始謂釋詁為周公所作其說蓋本于魏人張揖所上廣雅表言周公制禮以道天下著爾雅一篇以釋其義餘篇或言仲尼所增或言子夏所益或言叔孫通梁文所補解家相傳疑莫能辨舊有劉歆樊光李巡孫炎之學今惟郭璞註邢昺疏行于世隋唐以來此書不課於舉子韓

退之以古文名世尚以註蟲魚為不切則知誦習者寡矣宋初稍稍出後有以爾雅問題者以能辨鼠豹不識鼪鼯為對驚嘆博聞陸佃為爾雅新義自謂可使郭璞擁篲清道跋望塵躅然大率不出王氏之學與劉貢父不撤薑食三牛二鹿之語無以相過其為玩物喪志也甚矣要而言之易書詩春秋俱經聖人手定論語孟子孔孟之徒所記述後聖有作亦等游夏之一辭莫贊詩集註有廢序之疑胡氏傳有牽強之處儒者吹毛求疵

或好論說以自鳴一家固亦聖人所弗禁然度德量力
保無遺議而欲以一偏之識試蠡測之技徒見其勞而
罔功為紫陽文定之罪人則亦可以不必也三禮之書
多出漢儒所附益其義理未盡粹精言詞篇章一望無
雜不能不有待于好學深思之士定其指歸刪其繁惑
無使綜彙不倫庶幾有合乎周公孔子之精意夫亦吾
黨之責也孝經雖未必曾子所為然其書關係甚大必
不可廢採輯古今大義嘉言推而廣之發明至德要道

之旨為曾子之功臣可耳公羊穀梁皆傳也而列于經此推尊之無謂者則亦仍傳之而已爾雅決非周公孔子之書所謂叔孫通梁文者近是此乃字釋小學列之于經無益於身心性命天下國家之故余以為可廢已甚歸之字說音韻篆隸說文之流為學者游藝覽觀之一助足矣好古無識而為古人所愚亦非古人所甚願也

史學考

古之為史者有專官班馬皆世其業故其書出一人之
手成一家之言自唐太宗命廷臣共為之後世因為成
例意見錯出言人人殊而其書踳駁不可問矣古之作
史者以春秋編年為正體自司馬遷創紀傳後世宗之
蕭梁間又特起一例曰實錄雜取編年紀傳之法而為
之則以備史官之採擇無制作之意不足道也編年最
古所載一國治亂事最詳而人以紀傳便于披閱號為
正史則有不可解者矣今所傳為正史者二十一家則

皆紀傳之體祖司馬氏史記者也史才以遷為第一後世著述之士皆莫能及朱子曰遷才高識亦高但麤率則衷于道言之東萊稱太史公指意深遠寄興悠長微而顯絕而續正而變若魚龍變化不可蹤跡是其行文之妙固亦有然者也班固譏遷先黃老而後六經退處士而進奸雄崇勢利而羞貧賤此誠遷之所短然當其時武帝窮奢極侈海內凋敝反不如文景尚黃老人主恭儉天下饒富也武帝用法刻深而當刑者以貨免遷

遭禍家貧無財自贖交游莫救卒陷腐刑蓋其意有所
感憤故其言不無過當而能推尊孔子序列世家譏聚
斂而終平準則亦未可輕議者乎遷沒時史記尚少十
篇褚先生少孫補之然景紀疏略武紀全錄封禪書三
王世家但述封拜策辭禮樂書賡荀子禮論河間王樂
記傅靳列傳與漢書同餘皆猥瑣不足道則不及遷書
遠甚孟堅陽簿子長而陰實宗之所著漢書自高祖至
武帝盡用史記自昭至平則資于賈逵劉歆其八表天

文志則妹昭踵成之昔人謂固書皆因遷及王商揚雄
歆向舊文潤色之中間有冗瑣處由商之才不及數子
耳鄭夾漈極詆孟堅謂全無學術專事剽竊又云遷之
於固如龍之於猪則抑班太甚史所重在剪裁褒貶不
以無所依據為高而或又謂漢書制作之工如英莖咸
韶音節超詣後之為史者莫能及其髣髴是以諸史棄
遷而宗固劉知幾之徒尊班而抑馬則又推崇過甚不
知孟堅之史僅可為子長之續而紛紛議論皆未得其

平也范蔚宗後漢書自謂體大思精方孟堅而無媿蓋
類次齊整用律精深馬班以後誠宜位置一席但見識
有限體致局弱其序論欲于班固之上增華積靡鏤貼
錦綺論後作贊附贊懸疣自以為筆勢放縱實天下之
奇作則宋齊間文字風氣日降無如何也世譏其創立
后紀及採風俗通中王喬抱朴子中左慈等詭譎事列
之于傳抑節義之董宣于酷吏升忍恥之蔡琰于列女
則踳駁亦所不免哉陳壽三國志叙事高簡有法張華

王通皆善之但帝魏寇漢大綱顛倒因父髡故安桓武侯又以求丁氏米弗獲不為儀虞立傳則亦等之魏收穢史不足為君子觀也昔人謂三國志當更修定最為確論鄭知幾陳亮皆有志未成廬陵貢士蕭常為續後漢書起昭烈終少帝炎興而止既正其名又擇註文之善者併書之惜乎壽疏略于前使常無所藉手發揮于後今其書不傳則亦壽掩抑漢事之過也晉書隋書房喬魏徵等總其事合褚遂良長孫無忌于志寧李淳風

顏師古孔穎達李延壽等共為之隨其學術所長分授
區處各當其用類例出于敬播天文律歷淳風專之宣
武紀陸機王羲之傳論太宗所自為隋書序論皆徵之
作所以晉隋二志高于古今然晉書猶取沈約誕誣之
言雜采語林世說幽明錄搜神記詭異謬妄之語而隋
書則鄭夾漈稱其極有倫理本末兼明可以無憾遷固
以來莫能及也沈約撰宋書以何承天書為本旁採徐
爰之說頗為精詳但本志兼載魏晉其體煩雜非復前

人比又喜造奇說以誣前代創立符瑞一志荒誕不經
無益甚矣蕭子顯撰南齊書天文戶口莫能詳也其為
文喜自馳騁更改破析刻雕藻績之變尤多風斯下矣
姚思廉撰梁陳二書以繼乃父未成之志雖同事者有
魏徵然徵惟著總論筆削序次皆出思廉思廉父名察
仕陳時即為此書經三世傳父子更數十歲而後成成
又久不顯至宋始列于學者蓋其難也後魏書成于魏
收直借史以為酬恩報怨之具自謂舉之則使上天按

之則使入地其良心不存久矣爾朱之惡可滅何傳不
可以為佳穢史之稱千載不易其後齊亡竟遭發塚棄
骸之慘劉知幾謂其陰慝所致信夫隋文帝命魏澹等
更撰魏書九十二卷皆不傳而收書獨行于世則澹等
文章之陋也李百藥撰北齊書乃因父德林所撰述續
成以獻但其避唐諱不書世祖世宗之類議者少之令
狐德茶撰周書因蘇綽牛弘之舊務清言多非實錄李
延壽撰南史北史刪煩補闕叙事簡勁司馬溫公所稱

佳史者也然好述妖異兆祥謠識特為繁猥則其所不足耳舊唐書出于石晉宰相劉昫因韋述舊史增益之繁略不均是非失實甚以韓愈文章為大紕繆至宋仁宗乃命廷臣刪定之歐陽修撰紀志宋初撰列傳自言事增于前文省于舊而議者謂永叔學春秋每務褒貶子京惟刻意文章用字多奇澀復采雜說往往牴牾則新唐書不出一手亦未為盡善也歐陽修五代史深得春秋之法褒貶謹嚴依稀子長一體但天文不載變異

韓通不為立傳亦微疵也宋史立傳惟計官階敘述止
詳遷擢序道學則詮次失倫述盜賊則繁猥無紀濫漫
紛沓莫此為甚遼史失之蕪雜承訛襲舛不可勝窮揭
傒斯有心術宜正之規故所為金史簡質殊甚非宋濂
之元史忌諱不明所可比擬者也要而言之史家之學
前莫善於子長後則推夫永叔蔚宗抱負遠遜孟堅其
他數子得失參半姑以備一朝之事蹟雖極穢如魏收
未若陳壽三國志之三綱淪斃冠履倒置讀其書而不

痛憤必其人已無惻隱羞惡是非之心甘為亂臣賊子而無疑者也宋史靡蔓已甚卷帙繁多如卽抄雜錄有待採擇修定未可公然命之曰史也邵氏弘簡錄剪截枯槁如拙匠初學塑雕略似人形而聲音笑貌精神意氣槩乎未之有焉世人畏宋史繁浩不得不趨邵氏之簡便亦出于無可奈何也余謂三國志宋史二書當更新修定若畏難苟且以俟後人後人又俟之後人不亦吾徒之恥乎抑又論之編年之史本于春秋左氏涑水

司馬溫公祖述其法輯成資治通鑑一書治亂興亡瞭如指掌而義例未精予奪失當紫陽朱子憂之因作為通鑑綱目大書以提要分註以備言表年著統起威烈終五季千三百六十年間義精事核卓乎可繼春秋紹先聖筆削之旨元儒金履祥斷自唐虞為補前編明憲宗命儒臣商輅等續宋元以成後紀萬歷中渭上南軒又雜采宓義以來核而可信者列于前編之首可謂至詳且備獨有明一代闕如焉修補釐定繼往開來是亦

吾徒之責也夫

歷代歷法考

古者聖王仰觀俯察敬天勤民於是有治歷之法分周天躔度置閏月定四時成歲使民有所準節以各遂其生出入作息農桑畜牧諸務無差忒焉故自開闢以來歷法至今不廢軒轅黃帝始命大撓作甲子命羲和占日常儀占月車區占星氣隸首理算數命容成造蓋天儀著周天歷度作調歷以建寅春正月為歲首復迎日

推策作十六神歷積餘分以置閏此古今治歷之祖也
少昊之衰九黎亂德顓頊乃命南正重司天北正黎司
地以治神人萬物有序民安其生爰及帝嚳式序三辰
堯命羲和治歷象授人時東作南訛西成朔易分而理
之以閏月定四時成歲舜在璿璣玉衡以齊七政洪範
五紀一曰歲二曰月三曰日四曰星辰五曰歷數成周
大司徒以土圭之法測土深正日景以求地中馮相氏
掌歲月辰日星之位辨其叙事以會天位保章氏志日

月星辰之變動以觀天下之遷辦其吉凶秦火以後三代儀器蕩然無存欲求古者治歷之法具詳不可得聞也漢歷凡五變而司馬遷之太初歷本于黃鍾晦朔弦望序皆不忒唐歷凡八變而僧一行之大衍歷本于著策章部紀元皆與易合元郭守敬許衡共成授時歷測景驗氣定為歲差其法頗精古今稱善歷者此三家為傑出而三家之中前輩以授時為善謂其測候日月星辰消息運行之變專主晷景為最密也古今改歷不下

數十家自黃帝迄秦凡六改漢凡五改下迄隋末十三改由唐迄周十六改宋十八改金熙宗迄元末凡三改蓋日月有盈縮朧朧星辰有遲留伏逆出入于二道之間約七十年而差一度每歲差一分四五十秒年久數盈漸差漸遠有不容不改者爾嘗考堯時冬至昏昴中日在虛七度躔元枵之子至明嘉靖間冬至昏營室中日在箕三度躔析木之寅計去堯三千九百餘年而差者五十度矣若執滯不改將晦朔弦望失其節分至啓閉

乖其期何以行令訓民哉漢鄧平改歷洛下閎謂百年
後當差一度晉虞喜立歲差之法定以五十年久而驗
之弗合也何承天以百年劉焯以七十五年僧一行以
八十三年久而驗之又弗合也宋統天歷則六十七年
前輩謂邵堯夫差法冠絕古今却于日月交感之際以
陰陽盈虧求之元郭守敬許衡定以六十六年有奇而
退一度上考往古則每百年長一下驗將來則每百年
消一前輩又謂授時之制度越前代至明大統歷猶仍

其舊洪武中博士元統請以洪武十七年甲子歲冬至
為歷元雖不用授時消長之法大約名異而實同未有
以易之也然行之既久仍又弗合如正統十四年己巳
朔二至之晷有晝夜六十一刻之文正德九年八月朔
日食歷官報食八分六十七秒數俱不合而閩廣之地
遂至食既起復時刻又安得同夫天道之可驗者莫顯
于日月之交食而舛錯訛謬一至于此此鄭善夫華湘
朱載堉邢雲路之徒所以嘵嘵不已也萬歷末年太僕少

卿李之藻上西洋歷法述龐迪我龍化民等條陳歷算
十四事皆中國天文歷志諸書所未嘗及崇禎間開設
歷局尚書徐光啓薦李之藻共事徵西洋陪臣湯若望
羅雅谷等供事歷局闡幽極微一破從前訛謬明社旋
屋未及頒行我

朝握符凝命八荒為宇西洋臣子得與朝參聚精會神
晝夜推測一時象緯歷算之學迴出尋常今所頒行時
憲歷誠千古以來盡善無弊者也前輩謂漢自太初出

而一十七家之歷皆正唐自大衍出而二十三家之歷盡廢茲

本朝時憲歷出而上下百家俱不足言矣夫西洋習天主一教惑世誣民不可以令而用其長以治歷則班孟堅所謂專門之裔精算之士者仰見我

國家隨材器使知人善任度越前王煌煌乎文治之盛也抑聞之歷有理有數古今明歷數不少而明歷理者極難朱子亦曰歷不能無差今之學歷者但知歷法不

知歷理蓋舍理以求數雖窮極微妙必有不能盡合者
君子用歷亦究其理而已數學靈臺掌之非有大人之
事者所暇及也

錢幣考

人民之生資百物以為用而農工藝業各專所有不能
相通聖王於是以適用之物制為貨幣以權之有無相
濟貴賤相資天下無一物之不足所謂財者生民之大
命自太昊氏以來即有此矣太昊高陽謂之金有熊高

辛謂之貨陶唐氏謂之泉商人齊人謂之布齊人莒人
謂之刀虞夏商之幣金為三品或黃或白或赤或錢或
布或刀或龜貝又以珠玉為上幣黃金為中幣刀布為
下幣然珠玉黃金得之為難權輕重通貧富而可以常
行者惟錢而已故九府圜法自太公以來未之有改也
九府即周禮所載太府玉府內府外府泉府天府職內
職幣職金九官是也圜謂均而通也金計斤布帛計足
錢輕重以銖凡貨物出入以圜法均而通之故貨寶于

金利于刀流于泉布于布束于帛金者言其質刀者言其器布帛言其用泉言其形古錢形如篆泉字後世易以錢字故泉之文借為泉水之泉取流行之意焉周景王時患錢輕更鑄大錢重十二銖文曰寶貨錢之有文自此始秦作八銖錢文曰半兩而珠玉龜貝銀錫之屬為器飾寶藏不為幣漢興令民鑄莢錢薄如榆莢米至石萬錢文帝時更鑄四銖錢除盜鑄令武帝建元元年行三銖錢五年罷三銖鑄五銖錢元鼎二年鑄赤仄錢

以赤銅為其郭也未幾廢仍行五銖王莽之亂鑄大錢

十二銖文曰大錢五十又造契刀錯刀既而以劉字有

金刀皆罷之

契刀有環如大錢身形如刀長二寸文曰契刀五百錯刀以黃金錯其文曰一刀直

五十錯刻字也

而更作金銀龜貝錢布之品令敢挾五銖錢者

投四裔於是農商失業食貨俱廢建武間允馬援之請

仍鑄五銖錢以第五倫為督鑄掾昭烈入成都鑄直百

錢重四銖文曰直百孫權鑄大錢一當五百又鑄當千

錢民間患之晉初仍用五銖錢元帝渡江用孫氏舊錢

輕重雜行大者曰比輪中者曰四文吳興沈充又鑄小錢謂之沈郎錢宋文帝仍鑄四銖議者以國用不足欲禁私銅范泰諫止之其後有二銖錢無輪郭不磨剪鑿者謂之來子尤輕薄者謂之荇葉沈慶之啓通私鑄錢貨亂改一千錢長不盈三寸大小稱是謂之鵞眼錢劣于此者謂之縆環錢入水不沈隨手破碎斗米一萬至萬錢不盈掬明帝泰始初乃禁之梁武帝鑄女錢徑寸五銖無輪郭郡縣皆通用又有太平定平稚錢三吳行

之又有對文錢豐貨錢謂之男錢言婦人佩之則生男也普通中盡罷銅錢鑄鐵錢人以鐵易得私鑄更多所在山積交易載以車不復計數陳初始廢之改鑄五銖宣帝大建中鑄大貨六銖以一當五銖之十民以為不便嶺南諸州多以米布交易俱不用錢隋文帝更鑄新錢背面肉好皆有周郭文曰五銖又于揚州并州鄂州益州各立五鑪鑄錢奸猾愈多錢益輕薄濫惡大業以後或剪鐵葉裁皮糊紙以為錢相雜用之唐武德四年

鑄開通元寶錢每一千重六斤四兩得輕重大小之中
其文歐陽詢書時稱其工先上後下次左後右讀之自
上及左迴環可通流俗謂之開元通寶錢肅宗時以第
五琦請鑄乾元重寶錢憲宗以錢少禁用銅器武宗廢
浮屠法李郁彥請以銅像鐘磬鑪鐸皆歸巡院鑄錢周
世宗令民間銅器佛像悉輸官給其直謂侍臣曰卿等
勿以毀佛為疑佛志在利人雖頭目猶捨以布施若朕
身可以濟民亦不惜也宋初錢文曰宋元通寶太宗時

親書淳化元寶作真行草三體自後每改元必更鑄以
年號元寶為文仁宗中改號寶元文當曰寶元元寶詔
學士議俄特命以皇宋通寶為文慶歷後復冠以年號
神宗中皮公弼請鑄折二錢未幾又請鑄鐵折二錢皆
從之徽宗令陝西鑄折十銅錢大觀中改為當三孝宗
鑄當二小平錢寧宗即荊州鑄當五大錢皆不如五銖
之便故自元明以來不可易也楮幣起于唐憲宗時飛
錢合券特以通商賈之厚齎貿易者蓋執券以取錢而

非以券引為錢也宋真宗時張詠鎮蜀設質劑之法一
交一緡以三年為一界而換之六十五年為二十二界
謂之交子高宗時侍郎錢端禮造會子內外流轉其合
發官錢並許兌會子輸左藏庫邱氏曰宋朝交子至是
更名會子又謂之錢引謂之關子謂之關會其實則一
蓋直以紙為錢矣金循宋四川交子法置交鈔自一貫
至十貫五等謂之大鈔自一百至七百五等謂之小鈔
以七年為限納舊易新其後不拘年數字有昏者方換

之元世祖始造交鈔以絲為本每銀五十兩易絲鈔一千兩後又造中統元寶鈔行之既久物價騰踊民用匱乏至以鈔十錠易斗粟不可得明時猶以銅錢及鈔相兼行使而錢之弊在于偽鈔之弊在于多則以其用紙為之所費之直不過三五錢而以售人千錢之物宜其用之不能久也錢法貴得其中秦時八銖失之太重漢初榆莢失之太輕惟五銖為最善五銖之後或為赤仄為當十為鸞眼緹環為荇葉不知幾變惟唐之開元為

最善夫重錢之患在于難用而難用為累淺輕錢之患在于盜鑄而盜鑄為禍深自古以來論錢法者多矣惟南齊孔顗所謂不愛銅不惜工二語誠萬世鑄錢不易之要道也銅無所惜工無所愛則其錢之為錢體質厚而肉好適均製作工而輪郭周正本多而費重雖驅之使盜鑄亦不為矣瓊山邱氏欲拘盜鑄之徒以為工收新造之錢以為銅本孔顗之說別為一種新錢以新天下之耳目草天下之宿弊非無見也漢法非上林三官

錢不行崔沔謂貴以通貨利不在多余謂官錢多則私鑄自息惟其流布不廣故奸民得因以為利我

國家錢法盡善體質厚重磨礪精工宜其行之無滯而近局之地或壅塞而不流遙遠之處或流通而不足如閩廣江浙等省皆苦錢貴雲南又苦錢賤欲將滇銅購運則慮道遠費繁似當于湖南特設錢官開鑪鼓鑄以銷滇南之銅裕江浙等省之用廣東銅礦亦可開採即于閩廣之交命官開鑪併買洋銅鼓鑄以裕沿海各省之用部

頒錢文體式無使參差選方正清望之臣領之如第五倫為督錢掾長安無奸巧劉晏第五琦領鑄錢使而江淮政平任得其人何奸弊之足患民殷國富海宇蒙樂利之休其為利也溥矣

潮州風俗考

潮郡依山附海民有雜霸之風性情勁悍習尚紛囂其大較也蘇子瞻作昌黎廟碑謂潮之士皆篤于文行延及齊民號稱易治當時樸陋初開旋登彬彬雅海濱鄒魯

之稱所由來乎歷年既多流風日下文士漸趨浮華習
奔競先名後實而鄒魯為之一變矣武士恣睢倖擁節
旄刻剝富民摧殘桑梓衆皆欣而耀之充健兒結黨類
橫行市里行伍貴于詩書而鄒魯為之一變矣不農不
秀竄身公門鄉民獄訟恣其魚肉遂至煬竈藉叢威福
橫于士夫而鄒魯為之一變矣行伍之餘流為闖棍似
俠非俠瞋目街衢杯酒可代殺人一呼而聞百諾胥役
之餘流為衙僧為訟師間有衿監靡然慕倣而刁訟之

風熾不可遏矣鬻產告爭賣妻告奪丐屍權為父命蹻
跣舉作賓賢樓閣空中千奇百怪至於水落石出鷸蚌
俱傷尚懵然不知訟師之害已其亦可憐甚矣既不懷
刑遂輕憲網而有包侵國賦抗拒征輸積逋連年妄希
肆赦負氣喜爭好勇尚鬪睚眦小嫌即率所親而鬪至
以刀兵相格如臨大敵强者凌弱衆者暴寡而軟血拜
盟之風村村倣倣多以豪爽悞致殺人因或藉命抄掠
自殺圖賴視為奇貨投繯飲鳩刎頸沈河曾不少顧惜

馬世家大族輕蔑孤姓呵叱若僮僕之不如及其積糞
成家交遊恐後婚媾論財弗遘坦腹雖有賈董韓歐未
可與素封者子較一日短長也好酣歌新聲度曲燈宵
月夜傅粉嬉遊咿咿嗚嗚雜以絲竹管絃之和南音土
風聲調迴別千金買笑視同泥沙遂有遊妓蕩婦駕一
葉以當青樓又或締戲蜚婦風流自詡廉恥道喪未有
甚於斯也羣聚酣飲晝宵沈湎無貴無賤見賭則殉千
金之宅萬金之產刻燭方寸揭以授之他家而有所不

客輿夫菜傭襦袴蕩滌至于赤身沍寒衣蒲向火紙牌
在手不忍棄置大抵士庶之家十人九賭兵役之家九
人十賭通都僻壤無處無之蓋習俗之浸淫久矣賭博
之餘流為盜賊攘雞盜牛穿窬胫篋謂卑卑未足比數
也截途剽剝取其貨而割其膚足底龜紋曰防追捕或
則操舟溪河禦人于郊關之內結隊出海攘客于重洋
之外又或入山招匪盜窺礦砂金銀銅鐵鉛錫擅為私
家之故物逞強相奪霸踞壟口流毒地方為害靡有涯

馬酤信青烏家之說謂富貴出自墳墓沈迷風水爭訟
盈庭椎埋盜骨凶惡無所不至而程大平鎮相尚屢遷
葬後數年必發塚洗骸睇瞻凶吉至數百年遠祖猶然
洗視不休雖讀書明理者亦恬不自覺其非則貧癡之
陷溺然也信巫覡不重醫藥風寒暑濕動云命運哀低
衝犯鬼物三牲酒果鼓角喧天富者連日貧者半晷士
大夫家亦然耳罔極之喪置酒召客延僧禮識開冥路
打地獄云為死者減罪資福雖有賢良方正之親亦必

文致以剉磨春燒之罪告哀於佛自以為孝不知其為大逆不孝之甚者高堂無菽水之歡而齋僧布施盈千累百生死之交一錢推刃同胞骨肉半畝訟庭獨捨田入寺千頃不以為多建刹泥金萬鎰猶以為歉世風至此可痛極矣自昌黎公貶謫無聊偶與大顛一接僧徒藉為口實謬擬三書甚至肖形廟壁誣以折腰拜服之狀士大夫不知忿恚隨聲附和以為實然共尊大顛為祖師甚者凡遇禿廝皆呼師父不思此何人也而師之

父之所謂人心不死者安在乎佞佛之餘流為好怪石
或能言樹或能靈廁間古柩亦神亦仙酒肉香紙男婦
趨若狂焉於是有白蓮教天主教無為教又有後天一
教獨闢新奇男稱仙公女稱仙姑書符呪水治病求嗣
寡婦見夫悶香迷藥毒流遠近其敗壞風俗不可言也
鬼怪盛而淫邪興廟祀多而迎神賽會一年且居其半
梨園婆娑無日無之放燈結綵火樹銀花舉國喧闐晝
夜無間擁木偶以遨於道飾裝人物肖古圖畫窮工極

巧即以誇于中原可也婦女入廟燒香朔望充斥然皆
中年以上者及歲時應節踏青步月觀劇賞燈少艾結
羣直排守令之闥擁擠公堂沸若鼎溢遨遊寺觀跳叫
無忌不復知人間有男女之別矣海濱之婦或捕魚蝦
拾蛤蠣以資生計山城閨閣日陟岡巒樵蘇為業蓬頭
赤腳多力善耕雖昧踰閭之戒然瘠土民勞亦其勢然
也秀妍頑蠢諸邑不同霜貞勁節比比皆是歌黃鵠殉
所天陷賊滅血視死如飴誰謂巾幗場中遂無乾坤柱

礎哉下戶惡習慕富憎貧貌寢非甘糟糠弗願良人朝
出蹇修夕來則不當以人類目之者也總之風俗因時
變遷亦隨長上為轉移彰善癉惡樹之風聲實有不疾
而速不行而至者唐虞之世司徒教以人倫夏后孟春
適人以木鐸徇于路豈好勞哉我

國家重熙累洽

聖祖仁皇帝六十載德盛化神生民未有
皇上宵衣旰食惓惓以民生風俗為首務

聖諭廣訓一書為天地立心生民立命為往聖繼絕學萬世開太平雖使堯舜復起亦無以易守令小臣何幸身親見之自奉

諭訓以來海濱山陬共仰蕩平正直之王路每當城鄉市鎮朔望宣講父老扶杖而觀童兒翹首以聽歡欣蹈舞共興于孝弟仁讓之風潛消其獷悍囂凌之習日新月異漸幾淳美向之褻鋤德色箕帚詬誶好貨財私妻子不顧父母之養者今則肥甘娛老處處皆然割股和藥

廬墓為哀海潮揭饒之間不可勝數也知兄友弟恭之為美雖未必皆真情篤摯而一錢尺土胞乳操戈亦駸駸乎鮮矣則敦孝弟以重人倫之

諭旨為之發蒙振落也營宮室必先祠堂明宗法繼絕嗣重祀田鄰省鄉親望門投宿罔有所靳歲時戚屬樽酒言歡率以為常其於宗族鄉黨雖未必盡皆雍睦盡息爭訟亦庶幾有遵道之意焉農力于耕女勤于織高山亦種禾苗薯芋生于崖澗程繭潮紗潮毯麻葛諸布

流行海內服食器用亦稍以驕奢為戒若夫一擢千金
傾家結客則十一邑中未見有具人也工不甚巧而業
則專商競刀錐航海者衆福建臺灣寧波上海交廣海
南日本諸番視若戶庭行險逐末雖非中道而志定于
謀生靡有非分之叵測重農桑尚節儉務本業涵濡於
聖訓者深矣曉事者耆含哺嬉遊牆陰樹下說古談今
講法律以儆愚頑者有之父戒其子兄勉其弟勿干法
網各保身家訓子弟以禁非為者有之宵匪竄投鄉閭

側目畸人入境里社驚惶誠匿逃以免株連者有之一
朝之忿忘身以及其親兩口檳榔登時解釋其有深讐
宿憾亦可杯酒言消邇者命案已少其十之六七解讐
忿以重身命者有之明季士大夫驕橫太甚雷轟虎號
莫之敢撓及乎亂離之後摧殘剝落小卒賤隸皆得易
而侮之儒冠辱于泥塗迂腐供其談笑俗不重士士亦
遂不自重同流合汙不可問矣

聖諭慇懃士習遍方州而隆學校優其禮貌養其廉恥

有司以澹臺為貴士子羞奔競勵名節非公不至長吏之庭即有一二僧習未除嗜訟結黨皆為鄉曲所不容避匿他郡赧還故土矣曩時潮士好以禪學為詩文貝葉梵音傾心高妙昌黎原道而後莫有以道為言者郭鄭二子郭叔雲字子從鄭南升字文振從學紫陽雖著述不傳于世已為嶺南絕響他若中離黃岡或從姚江講學或遊白沙之門其學以良知致虛為要不外陽儒陰墨之宗旨道其所道非吾所謂道也自是而後高者習為雕蟲卑者

沈于制義茫然不知正心誠意為何物子臣弟友為何事濂洛關閩為何人弋獲科第而已矣今則棉陽士子濟濟以聖賢自期待朔望衣冠而拜先儒飭躬勵行而講正學妖書邪教殄滅廓清不特儒佛之介辨之甚明且於朱陸異同言之歷歷海陽學者亦多志道幸黃冠之消亡冀緇流之歇絕謂安得邑之寺盡如一邑之觀澄海遊僧鵠張說法一朝就縛士林稱快揭陽普寧程鄉惠來諸邑皆知程朱之正傳不為異端所搖惑斯則

經正民興吾道昌明之一大元會也文風之盛冠于嶺南三陽一鄉澄海饒平竟有經經緯史矩矱先正公然與江浙爭雄者即以科名而論亦當百粵之半言忠言孝言禮言讓儒門恥於爭奪風尚為之日躋則

聖諭所謂黜異端崇正學者蓋已服膺親切而明禮讓以厚風俗亦毅然油然庶幾欲求無悖於煌煌

大訓哉曩時健訟成習刁誣甲于寰區潮陽詞狀日投一千八百楮海陽揭陽五七百楮其他或三四百或一

二百多寡不同未有在百以內者今已各減其十之八
訟師藏頭靡耳有散而之四方者

聖諭再迪數時誣告可以盡息而善良咸歌樂利也曩
時竊劫盜賊從橫遍野水陸皆戒心之地今則狐鼠草
面郡邑俱已肅清行旅恬於戴星夜戶可以不閉保甲
之效亦既彰彰若此矣曩時逋賦成風紳衿大豪較小
民為更甚是以捐籍雍膠亦甲天南諸邑監生多者至
二千人次者千餘人最下亦數百人恃護符提催差捨

命催科不能完十分之五六今則紳士皆踴躍輸將急公以為民望本年糧米如普澄惠埔平鎮諸邑或入秋即已通完或冬臘並可廓清海揭程饒皆在九分以上雖以潮陽之積逋難追亦于十月之內清至八分有奇比及奏銷報最綽綽此從來未有之事皆由

聖諭深切著明有以大發其羞惡之心天良一動嚮化如流以至此也向來惡俗洗滌淨盡者有三曰賭博曰私宰曰盟軟賭博之弊拔根塞源追售賭具者無有矣

私宰之輩投刀改業即以一金市一鬻牛肉無有矣盟
軟之儔雪消見現併強宗閹俠好勇鬪狠之風亦大為
斂戢矣遊娼戲婦咸逐出境私蠶外淫並為厲禁蕩舟
沈湎歌舞嬉遊皆自知羞愧焉惟喪事供佛飯僧信巫
尚鬼遷塚洗骸賽會燒香遊燈好戲重富輕貧趨炎附
熱此則習俗所未盡蠲者力行

聖諭仁漸義摩沐浴于道德齊禮之中有不回心嚮道
以幾時雍風動之化無是理也敬錄

聖諭廣訓書永垂方策以為移風易俗之心傳俾千秋
百世為司牧者知所準則焉

鹿洲初集卷十四

欽定四庫全書

鹿洲初集卷十五

廣州府知府藍鼎元撰

賦 檄 銘 箴 贊 節略 事錄

臨漳臺賦

試登漳城萬象縱橫停驂四望百慮環生地轄揚州之
域野分牛女之星羣峯繞翠一水澄清雉堞峩矗烟井
喧轟門因貢珠著堂以尊道名樓有喜雨之頌閣有齊

雲之稱郡判曾為留珮君子於焉建亭凡皆錯落部屋
之間共藏風而聽月未如雄踞高山之頂獨結瑤而構
瓊緊惟臨漳之臺實擅丹霞之勝基跨龍首形開鶴顙
規天矩地竦峙方正鬼戾喋莫之與競遂偃蹇而上
躋過雲霞於膝脛可以望氛祲察災祥順時敷政時觀
遊節勞逸省風布令覩茲下土之有幹有年何妨耽樂
而以觴以咏爾乃東望岐山竹節清泉萬松鳴鶴嶄巖
蜿蜒鐵甲之崖方隋壁鴛鴦之樹欲參天亦嶼流丹來

海嶠白雲舞練於日邊至如南望郊關清溪橫帶雙橋
卧波似龍兩大霞山環水雲之館洲荷張刺史之蓋綠
楊垂柳恍忽章臺虎洞獅巖備極一方勝槩又如眺望
西北岡巒騰複湖光潑艷山際流瀑天寶珠飛龍江漁
匱圓山康叟之祠北溪安卿之屋瞻天柱如培塿俯歐
寮若寸木皆迴環於臺下使我臨風而躑躅於是思今
弔古設想噫嘻紫陽泣漳之日吾道南來之期則斯臺
也為講學明禮之區固與靈臺重壁互相等夷而非一

柱九層敢共驅馳若夫登斯臺而恤民隱則有柯判感
鵲之精誠登斯臺而談兵事則有姚侯平海之戰征劉
表呼鷹未足方其意趣項王戲馬詎足比其英聲亦有
倒懸之士羨黃金於易水愛花之客慕避風以徙倚歲
時士女遙逍容與管絃嘯歌雜沓羅綺汝酒既清汝殽
既美我呼得盧子呼得雉絕類桂宮走狗之風依稀廣
陽鬪雞之鄙余獨立臺上兮忽超然而徜徉視千峯之
俯伏兮神欣欣而樂康疑日月之可接兮羗舉首以昂

藏望鵬鯤於北海兮振鳳凰於高岡覩萬家之烟火兮
喜桑麻之青蒼但覺耕食鑿飲羣黎之皞皞兮孰辨夫
堯臺與臨漳

擬諸葛武侯伐魏檄

建興五年

蓋聞君臣大義萬古為昭不臣當誅千秋常典是以蚩
尤作亂軒轅有涿鹿之兵防風弗懷文命有會稽之戮
少康一成一旅亦滅過戈召虎來自來宣遂平江漢趙
盾縱賊董狐筆曰弑君陳恒作奸孔子聞而請討誠以

天冠地履分位截然見無禮於其君如鷹鷂之逐鳥雀
不容亂臣賊子橫行於光天化日之下也曹操以譙東
梟雄逞穿窬之智假倡義兵暴寡脅弱逼遷求與覬覦
神器跋扈專權陰鷲浮於董卓憑陵造孽跳梁等之黃
巾乃自為將軍改丞相封魏公進魏王目中全無君父
矣復自加九錫僭車服建宗廟立社稷天下有此人臣
哉桀驁之形日甚一日篡奪之勢夕不俟朝滿布爪牙
摧排善類中外惶惶若挾蛇虺雖齊田魯季晉室六卿

未有若斯之橫也於是孝愍先皇帝切齒痛心密傳衣帶之詔百官裂帛怒髮共議市朝之誅方謂刺趙高於秦廷殲少卯於魯觀殄除逆黨肅整朝綱詎意偶洩機謀頻遭反噬董承死節耿韋竭忠甚至操戈犯闕弑后妃於天子之前仗劍入宮戕皇嗣於朝廷之上罪逆滔天古今無比猶且妄擬文王污蟻先聖哀哉無忌憚也拔舌有餘辜焉雖賣履分香如鬼如蜮豈天下後世可堪欺罔賊子丕世濟兇虐繼操之志行莽之事攘奪王

璽傾覆金甌華歆王朗之徒舐糠覈餌賈詡陳羣等輩
澤吻磨牙遂使巍巍御座上據野狐濟濟王官下拜閭
孽二十四帝沐雨櫛風之社稷一朝頓移四百餘年尊
賢養士之國家萬死莫贖嗚呼痛哉猶幸天眷未絕民
思舊德我昭烈皇帝繼統西川存復祖業即欲捲旆北
征誅夷叛亂而國家多故匪遑離局大志未遂中道崩
殂是以吞舟漏網未正司敗之刑負嵎稽誅致效夜郎
之大亮受先帝托孤之重夙夜兢兢誓討國賊而老奸

天殛小猾數終無由馘操禽丕傳首以謝天下惟當滅
曹興漢鞠躬以報聖朝曹叡黃口乳臭冥頑無知襲父
祖之餘兇孽非已作忘宇宙之名器情亦可原但文繡
雖華非龜盧所應要曳八珍雖美非蛙蚓所得噬酣自
有開闢以迄今茲未聞跼蹐終奸天位誅寒浞於窮門
非得已也嚮新莽於長安此其時矣亮奉列聖威靈嗣
王顯命大舉貔貅以除螻螳鼓輦動地雷厲而風飛刀
戟連天日臨而月照將以忠義勝吞強寇如屠匹雛兵

以節制強靖邪氛若掃秋穰逆不敵順暴豈當仁震疊
無前蕩平有日為此特申大義布告中原凡汝從賊官
民孰非本朝臣子或膺累朝之寵命或受先帝之厚恩
因迫脅而事仇知非本願相事機而報主寧罔懷忠倘
能殺賊來歸即膺上賞若將全城獻納且錄崇勲前徒
倒戈血流何須於漂杵首稽崩角迎師無藉乎簞壺苟
曹叡能蓋前愆自知罪戾乘天兵之未至去僭號而乞
降則解縛焚櫬貸厥餘生畀之侯封以存先祀亦非大

漢之所吝嗇也司馬懿父子及諸夏侯等吠堯非主皆
忠所事本朝寬大咸與維新並虛上卿之位待以家人
之禮幸即幡然悔悟叩我軍門無以曹氏親睨自生疑
畏烈崑岡之炎火予亦何敢為此心逞螳臂以當車汝
甘自罹于死地哉其師旅所過地方秋毫無犯農安隴
畝賈安市廛如舊營生不必驚悸凱旋之後復爾征徭
第殲渠魁以洩九廟祖宗之憤式除逆醜用慰萬方億
兆之情俾遠邇州郡悉知此意早圖草面免致噬臍此

檄

巨硯銘

鐵面石骨磨礪一世吐納煙雲揮灑天地既以重而威者固吾學復縝密以栗而潤澤之光被禮樂刑政蘊諸中而裕如仁義道德取之懷而咸備遇堯舜則安安以陳謨逢湯武則戛戛而作誓在杏壇刪述六籍磨而不磷實居弟子之班及考亭註疏經書沈浸醲郁若好友之不可須臾離胡為乎入塵坱之羣任童兒以磨涅粹

焉擲地作雷聲保無瓦全之是悖吾將借義之之池濯
爾顏之俗氣爾其息交絕遊與吾偕隱於深山茂林之
際理杏壇之故業追考亭之高志唾珠噴玉垂華袞鈇
鉞於千秋將使龍尾馬肝若夏瑚商璉彝鼎球圖之重
器

墨海銘

壬子夏仲余之端州長兒雲錦從將遊七星巖而不果
購得一墨海以歸甚樂之乃為銘銘曰

端溪石出巖嶰雕為圓硯名墨海潤澤起烟雲觀者疑
鼎鼐形似太極分陰陽又若中原環四澣雅量要寬深
可為世模楷容墨數斗筆如椽大書特書生光彩何羨
乎松臺室七星巖對茲片石足千載

古琴銘

童年有志琴學苦無師長欲聞聖人之道覺日夜孳孳
不遑復他及矣已酉夏日獨坐土室鄉人寄古琴贈余
梅花斷紋遍滿腹背中間有文曰碧泉不知為何代法

物俾余學之以解慍余曰噫何慍吾自樂其樂非人所
能使之憂造次顛沛心常自得不啻太和洋溢宇宙也
雖然古琴難得不可以虛人之賜命兒曹學之既成而
鼓我心益陶陶然乃銘曰

我自賞音不問鍾期高叟洞中白石澗湄焚香靜坐結
想黃羲一彈再鼓我心則怡

劍銘

少時好劍弗可得命工鑄青萍尺許佩之友人嗤焉旋

亦棄去已酉遭難誦古人欲請尚方斬馬劍之語甚壯
之適有以紅夷劍見惠者名曰秋霜光閃閃如掣電喜
不自勝遂拔起舞覺胸中浩然為之一快乃銘曰

心有懷請尚方誅奸黨掃欃槍美人贈我紅夷劍極目
閃電名秋霜但把太阿持在手僉士膽落民庶康千秋
太平如此日挂之壁間好善藏

持敬圖自箴

夫夫也少不自量夔高為徒先人教之誦法程朱循分

盡性匪躡匪拘從容深造為君子儒長遭坎壈牛馬馳
驅學殖荒陋浪擲居諸繫心民物罔顧擲揄流離顛沛
謬學著書兢兢寡過惴惴昏愚立誠持敬寢食與俱試
思天地之廣大載籍之紛如至道之弘遠聖學之蓄畬
雖假汝彭聃之歲尚孳斲不見其有餘何半生之碌碌
至此始愧汗於勤劬雖然猶未也古人寸陰是惜既耄
而好學不渝尚及今夙夜黽勉庶幾乎不自暴棄以明
善而復初

訪道圖箴

陳雙山海陽詩人也年七十六矣篤於學為潮中老名士鄉人多宗之然好浮屠自以為得其秘私謂余同年友蔡世厚曰藍公惜不信佛我當攜佛書示之世厚曰先生欲焚佛書則可不然不可令藍公見也雙山乃止然猶有援入意一日出訪道圖小像命書數語余曰善遂為之箴云

此老不聊圖新面目遊心浩渺崆峒之麓文繡弗華曳

彼道服杖頭錢盡葫蘆繩束駕言訪道徘徊躑躅道不
遠人當身自足日用倫常放則彌六至誠盡性其次致
曲用舍行藏與時伸縮胡為遑遑誰訪誰逐此老聰明
有書滿腹長吟短章稿幾盈屋豈厭盛名將趨靜穆抑
昔詩人逃禪成俗彼學虛空如入幽谷人人火書惟恐
不速此老大賢詎為所枯寫意適情不拘方幅左無黃
冠右無緇禿固知二氏非其所欲春風沂水亦翻新局
觀者無誤謂求天竺

畫鷹欺熊箴

余所見古今名手畫鷹者衆矣大抵類正鵠繡羽毛鮮可觀也玉山佈置超脫有勢有神鐵幹梅花踞棲得意又作一熊趨樹下彼此相照似極惶急余頓怪此鷹強梁不覺動抑強扶弱之興援筆袒熊主反為客此則玉山之能移我情也筆墨之妙一至于此可愛也夫為箴曰

鷹犬之才眈眈熊羆之彥得無有妬心乎汝既居高臨

下可肆搏擊彼亦自忘雄健靡然而趨豈其智不足力
不敵哉高卑之勢懸也試思如熊如羆則折衝禦侮非
熊非羆則帝王之輔豈汝輕薄羽毛所能攫拏而吞噬
况彼多力趨捷肯困草莽泥塗間誠恥夫饑附飽颺如
汝輩饒口惟利是視耳梅花初放春色方來且各息爭
機從容相睇各自樹立何如

曾叔祖侍御紫濤公像贊

於戲此吾族祖紫濤公遺像也公弱冠遊學粵東入海

豐庠登賢書粵人許而削籍崇禎元年詔改還閩籍成進士以家于粵不忍去卜居潮州之普寧子孫遂為普人矣雍正五年鼎元奉

簡命出宰普邑普中父兄子弟皆體諒遠嫌鼎元亦未遑敦一本之誼幸各守禮法興仁讓無獲戾於普邑士庶然此心缺然亦足見俗吏之不可為也罷官之後乃步入祠堂啓公像瞻拜焉歲久蠹蝕命工人整而新之為贊曰

赫赫直指蹇蹇王臣公忠為國康濟生民觸邪排佞不

憚批鱗明末宦寺勢傾紫宸公䟽搏擊大璫王坤羣閹

屏息朝廷始尊薦黃救魏

薦起黃道周
論救魏呈潤

威鳳祥麟海內

拭目治平可臻法行自近戚里元勲蹻蹻權貴望風而

奔三邊驄馬九野懽訢大同宣化遺澤今存梁督廷棟

失馭辱軍公糾其罪將士氣伸出按三楚時事焚焚崔

符遍野藩封腥聞民生其間如溺如焚公心憂傷不寐

忘殮日撫流寇夜籌脫巾王不可治治其私人他藩猶

可貪虐惟岷岷藩長史聽者驚魂吳氏從哲其惡無垠
擢髮難數天日為昏請誅諸市以快羣倫遭王反噬禍
幾及身民懸可解身家遑論逆賊獻忠妄肆邪氛禽斬
未能權施撫循既撫復叛叛後更馴極知養虎非可相
親冀獲掩捕如縛雞豚殫心竭血兔爰頻頻天不祚明
人謀空慙鞠躬盡瘁可告蒼旻公之忠誠衝霄貫雲敬
瞻遺像嚴厲直溫子孫珍重千秋不泯

叔祖司馬時山公像贊

時山公富於學博通今古典故尤以詩名仕明為職方主政見時事日非急歸田絕仕進念順治八年

詔起復原官以母老辭不赴逍遙山水年八十餘猶飲酒賦詩自樂鄉人以為有陶靖節先生遺意云贊曰

聖人之學時中而已可仕則仕可止則止公在勝朝宦情如水甫入中樞投簪還里急流勇退見幾知委

盛世蒲輪翹翹趣起有母年高難堪陟此陳情終養人稱孝子從茲息遊談經論史寄傲東郊閒觀耘耔崑山片石

坐卧徒倚有酒則醉登舟則艤隨興賦詩以蕉代紙遇
景盤桓不知遠邇八十餘年靖節相似與時偕行江流
嶽峙

懷遠將軍劉輯侯圖贊

將軍楚人也分節潮陽潮之人安樂之余以丁未冬兼
攝潮令象與將軍同城值頻年荒歉之後軍士乏糧者
半載懸釜嗷嗷民間岌焉賴將軍威德深入人心約束
至善是以軍士雖枵腹而罔敢越思得以待余之來也

崔符遍野水陸道梗將軍與余同心協力晝宵擒鋤二
三十年漏網之盜靡不搜治廓清共事歲餘未嘗以私
干瀆惟地方利害侃侃商謀佐余不逮者甚多今潮人
夜靡弗闔商旅晏然兵民相親如同昆弟皆將軍力也
余以狂愚致觸權鋒遭吏議軍士憫西來批穀累余身

家願于月餉搭支免余賠墊

道憲樓公運來西穀一萬四千石積貯潮陽運官船

戶沿途盜賣買批穀撓和應為賠補三千餘石余查出
奸弊拿獲贓穀併盜買犯證繩船戶等以法致蒙憲怒
捏款揭參時方賠過一千二百石尚有批穀二千餘石
弗能代賠潮陽海門達濠三營目兵憫余受累願于月

餉搭支於是署事接任陳閱二同寅亦與余分
賠一千二百石其餘分配營兵支完方得免累
古道之

風猶存行伍知將軍之德教深矣今

當宁留意人材將軍一舉一動皆超羣類之表旦夕遷
大鎮節鉞封疆自其分內事耳余既愛將軍材武重將
軍之行誼喜將軍惓惓民生為余綏靖地方之知己也
於其圖而為之贊曰

偉哉將軍孔武且仁威鳳丰姿龍馬精神強弓大戟絕
類離羣出入行陣虎吼雷奔五羊勞勩黃岡忠勤自來

潮邑山岳生春伏莽草面夜吠無聞兵曰師保靡梗弗
馴民曰父兄藹然以親惠澤公溥投醪飲醇帶牛佩犢
沐德維殷樸誠直爽不事虛文言言要道步步率真胸
有血性手無污塵瘴江蜃蜮變幻烟雲風清日朗僅見
斯人他年績茂追古大臣將移此圖繪之麒麟

壬午忠節略

建文壬午燕王棣陷京師羣臣不從逆而死者百餘人
文學博士方孝孺斬袁哭罵不肯草詔抉口鉗獄燔削

先墓戮其九族皆不從乃并坐其朋友門生廖鏞林嘉猷等為十族然後磔於市坐死者八百七十三人謫戍死者不可勝數二少女被逮過淮連袂投水弟孝友亦慷慨就戮有取義成仁在此間之句兵部尚書鐵鉉背立庭中割耳鼻爇肉令啖不肯一顧寸磔至死罵不絕口以油熬其屍令內侍以鐵棒夾使北面油沸丈餘內侍手糜爛走屍仍反背老父母安置海南二子編伍充匠尋皆見殺妻楊氏并二女發教坊楊死二女終不辱

後赦出適士人左都御史景清植立嫚罵挾其齒血噴
王袍剝其皮實以草繫長安門碎磔其骨肉燕王過長
安門索忽斷所械皮趨前搏王王驚命燒之已而夢清
仗劍追繞王座赤其族籍其鄉村里為墟禮部侍郎黃
觀聞變投水死亦束芻冠帽對於市籍其家連姻黨百
餘人皆謫戍妻翁氏并二女配象奴翁及二女家屬十
餘人俱投淮清橋下死監察御史高翔喪服不屈沒產
夷族諸給高氏產者悉加稅令世世罵翔親戚悉戍邊

又發其先墓雜犬馬骨焚灰揚之以其地為漏澤園右
副都御史練子寧斷舌不屈血書成王安在宗族棄市
者百五十一人九族抄戍者三百七十一人大理寺丞
鄒瑾京師陷自殺亦夷其族四百四十八人僉都御史
司中召見不屈以鐵帚刷其膚肉至盡姻婭同死者八
十餘人大理少卿胡閏哀絰不更夷族不屈命力士以
爪落其齒齒盡而罵聲不絕剝皮實草殺其家二百十
七人監察御史董鏞姻族死戍者二百三十人禮部尚

書陳迪抗聲指斥與六子同磔於市宗戚被戍者百八十餘人千秋公論明于日照徹區區不二心其衣帶中之句也袁州太守楊任籍產族誅親戚百餘家皆遠戍戶部侍郎卓敬以不為管仲魏徵夷三族太常卿黃子澄少卿盧原質監察御史魏冕王度巨敬盧振宗人府經歷宋徵皆以不屈夷其族御史鄭公智以不屈故戍其族左拾遺戴德彝不屈將赤族嫂項氏聞變令盡室逃獨身留被械焚炙遍體無一言戴族乃全其不及宗

族親戚而被殺戮磔械棄市者刑部尚書暴昭去齒斷手足斷頸而不悔郎中王高大理丞劉端俱滅鼻捱殺而猶謂有面目可見皇祖侍郎盧迥長謳受刑御史甘霖從容就戮連楹引頸受刃白氣冲天而僵立不仆張彥方暴屍譙樓暑月經旬而顏色如生戶部侍郎郭任父子俱死兵部尚書齊泰駙馬都尉耿璿兄弟俱死副都御史茅大方父子祖孫俱死青州教諭劉固父子兄弟老母俱死漳州教授陳思賢率六生哭於明倫堂亦

俱坐死六生者伍性原陳應宗林珏鄒君默曾廷瑞呂
賢也又有尚書侯泰侍郎黃魁胡子昭給事中葉福陳
繼之韓永御史丁志駙馬梅殷長史程通龍鐔博士黃
彥清按察僉事湯宗知府姚善葉仲惠陳彥回黃希范
同知周繼瑜知州蔡運神策經歷周璿皆被殺戮磔械
棄市以死其不屈而自殺者吏部尚書張統侍郎毛太
太常卿廖昇僉都御史程本立衡府紀善周是脩谷府
長史劉璟御史林英夫婦孝子高巍自經死給事中黃

鉞赴水死龔泰投城死翰林王良伏鴆死郎中譚翼赴
火妻子自縊死浙江按使王良自焚死其妻先投水死
中書舍人何申慟哭吐血死都司斷事方法投安慶江
死樵隱指揮張安棄柴投水死工部侍郎張安國及其
妻鑿舟自沈死寺丞周宗起及其子俱投琴川死永豐
鄒朴教授劉政吏目鄭華不食死浮梁教諭王省觸柱
死含笑於地下不愧文天祥而御史曾鳳韶夫婦死矣
翹首謝京國飛魂還故鄉而刑部主事徐子權死矣周

粟豈不佳所見良獨偏而修撰王叔英及其妻二女死
矣至於燕山衛卒東湖樵夫或日夜涕泣不食而斃或
仰天大哭投湖中皆死者也其最可恨者身死而妻女
分隸教坊配象奴若鐵鉉黃觀齊泰茅大方胡閏陳繼
之姚善侯泰董鏞郭任謝昇胡子昭陳彥回牛景先等
十數人皆遭此虐焉

論曰嗟乎此豈有仁心者哉毀體磔身熬屍剝皮慘於
炮烙隸教坊配象奴辱於剝剔殺戮之慘何若是之甚

也嬴秦雖暴族不過三不聞其以十也發人之墓辱人之妻女酷烈之行也甲申之變完節者六十餘人不聞李自成以此施之也忠臣義士何代無之未有若斯之慘且衆者也開天闢地以來殉主報國之臣夷滅菹醢至永樂時極矣因誌其大略以為萬古之戒

臺將劉得紫陷賊不屈事錄

劉得紫字樹公其先直隸文安人有明中葉七世祖指揮均寓居遼陽遂籍焉我

朝龍興遼陽首附收入正紅旗得紫伯父清泰總制八閩父
朝英以甲午副榜授湖北江夏令卒于官得紫時方十二齡
家徒壁立孤苦好讀書尤工騎射康熙四十七年八旗以騎
射選引見得錄用由步軍校牛錄章京累遷至侍衛

上神武善射百步穿鼓子百發百中顧羣臣罕有能及
者命得紫得紫惟

上意所適視鼓子中邊上下左右命中不差毫釐

上大悅自是每射必從明年補石匣守備未幾遷山海

關都司復遷汀州鎮右軍遊擊五十九年調臺灣鎮中
軍遊擊秋七月抵任訓練有方子兵字民臺人敬且愛
之在臺九閱月南路崗山土賊朱一貴倡亂夏四月二
十有一日聞報請出師親往勦賊鎮帥弗許遣右軍遊
擊周應龍以行越七日兵敗賊陷南路營乘勝直趨攻
府得紫偕鎮帥率諸將弁分劄春牛埔禦之晦日大戰
得勝賊退竿津林五月朔日黎明賊衆漫山塞野分路
俱集得紫獨當一面鏖戰中路口須臾兵丁王福舟奔

報鎮帥兵敗得紫急殺回春牛埔救應則總兵官歐陽
凱水師副將許雲遊擊游崇功戰敗死矣賊四面攻圍
得紫猶賈餘勇左衝右突奈衆寡不敵所乘馬為賊所
殺遂被擒引頸受刃賊素重其名不忍殺得紫從容謂
之曰吾為

天子命官今日萬不宜有生理但求埋吾帥屍首死亦
瞑目賊首黃日昇嘉其義聽之已復羈學宮朱子祠求
死不可得賊與之言弗應遣其徒進食弗食餓數日不

得死同難漳浦人陳上珍見其不食不語日永難卒度
貽綱目三卷自卯至酉不釋手賊勸之降厲聲曰汝輩
要我順從快把刀割了頭去賊相謂曰劉公忠義人從
其便但戒守者不令出凡良民入省視弗禁得紫猶不
食七日仍不死把總張文學贊禮生陳時遇揣其不食
賊之食親為煮粥勸進得紫泣曰食祿不分憂乘馬不
濟難縱賊憐而生我何面目見東寧父老是時羣賊不
和將吞併諸生林臯劉化鯉等言諸賊皆攘雞盜牛椎

埋烏合之衆亡可翹足待乃稍稍進粥食延性命以待
王師貢生黃國英民人鄧世祿楊鼎龍等餽金錢衣服
物食日相繼有不識名舊兵見得紫卧地移一床與之
又有泥水匠贈氈褥亦不知其名六月十有六日大師
攻克鹿耳門復安平鎮得紫聞知大喜然守者益戒嚴
十七十九兩日戰鯤身賊復大敗得紫陰散賊黨去者
半焉越三日守者盡逃得紫因得出遂叩統師軍前請
帶罪立功募丁壯百五十人隨師征勦北路二十八日

遇賊於大穽降得紫奮勇先驅衝殺大敗之所向無不
一當百斬賊徒無算奪其旗械窮追至鹽水港閏月七
日領兵接應溝尾庄鄉民圍捕賊首朱一貴等巨魁脅
從皆就縛南北二路悉平臺郡士民以得紫為奇也白
其事于總統大帥請旌之以勵臣節

論曰劉得紫可謂從容就義臨大節而不可奪者也崗
山之役早以斯人行當必不至于此悲夫東寧禍殃蓋
亦有天定焉士君子遭際不同或舍生取義而死或取

義求死不可得而生其忠貞一耳得紫德容晬盍望而
知為端人正士余東征得覩丰裁愉快不能自己於其
去也思之深因珥筆而書其事雖然君子愛人以德得
紫今後或出或處俱不可知當念名節既成以第一等
人物自命無使後之遜今則余文藉不朽矣吾友何峯
山將還中土此行必見得紫以斯言告之

鹿洲初集卷十五